

EDITORIAL

Papintason an mga pakigbisog kontra ha pakuri ngan traydor nga rehimen Marcos

Padayon nga natikahilarum ngan natikagrabado an pag-inantos han katawhan Pilipino tungod ha mga programa ngan palisiya han rehimen Marcos nga kontra-kablas, kontra-katawhan ngan pabor ha dagko nga langyaw nga kapitalista ngan mga lokal nira nga ahente, mga agaron maytuna ngan burukrata kapitalista.

Nagpapatakas an pamilya nga Marcos, mga kroni ngan alipures ha pondo ngan pribilehiyo han gubyerno, samtang naluludlod an kinabuhi han mayoriya han mga Pilipino. Patal-ha-pagtrabaho an mga trabahador ngan masa nga anakbalhas. Kulang gud an suhol ngan sweldo atubangan han padayon nga tigda nga paghitaas han presyo ngan mga surukton. Milyun-milyon an waray trabaho. Gutiayay an ginkikita nga nalabay la ha kamot han masa nga kablas. Natikadamo an napipiritan ha kontra-sosyal nga binuhatan para la mayda maipakaon ha ira mga anak.

Nangangalas gud an katawhan ha rehimen Marcos ha kawaray pagpaid hini ha masa nga ludlod ha kakablasan, ngan ha pagpapagrabado hini han krisis ha pakabuhi ngan pagkukuri han katawhan. Nagpapakabungol hi

Marcos ha hiluag nga panawagan han katawhan. Ginbabale-waray niya an guliat han hiluag nga masa para ha makaburuhi nga suhol ngan sweldo, trabaho, tinuod nga reporma ha tuna, katungod ha katubigan, pagpapadako han badyet para ha libre nga pankatilingban nga serbisyo ngan para pahiluag an lokal nga produksyon, ngan iba pa nga kadagmitan nga demanda.

Lugod, libang hi Marcos ha mga pakita-ha-tawo nga pasalida nga waray dara nga kalungganayan ha katawhan, sugad han dako nga drama han pagbalasa ha gabinete (nga tutulo man la an ginsaliwnan), pagpaparayaw ha ₱20 kada kilo nga bugas (nga labot ha pipira la an nagpulos, kadali la), libre nga

sakay ha LRT (nga upat kaadlaw la) ngan kun anu-ano pa nga buaw nga gimik (pang-engganyar). Agud uwat an katawhan, nagpapagawas hi Marcos ngan mga upisyal niya han mga estadistika agud tahuban an padayon nga paggrabe han krisis ha ekonomiya, paghitaas ha presyo han mga paplitan, ngan dugang nga pagkaludlod ha kakablasan han milyun-milyon nga Pilipino.

Hul-os an pagtamas-tamas han rehimen Marcos ha katungod ngan pakabuhi han masa nga anakbalhas. Agud kayeron an mga langyaw nga kapitalista nga mamuruhunan, ginraysang ni Marcos an suhol han mga trabahador agud singabuton an ira barato nga kusog-pagtrabaho. Ha kabaryuhan, gin-gagamit ni Marcos an pasista nga militar agud ighagudalan an hiluagan nga panlulupot han tuna para ha mga plantasyon ngan operasyon nga pagmimina, nga nagpapalayas ha gatus-gatos kayukot nga parag-uma ngan mga nasyunal nga minoriya nga katawhan ha ira tuna. Gin-aagawan hin pakabuhi an parupangisda, mga drayber han dyip, ngan iba pa nga gudti nga nagpapakabuhi. Ha ngaran han pagtitipid, plano ni Marcos nga ibanan an empleyado han gubyerno nga dugang nga magpaparaot ha pampubliko nga serbisyo.

Pakuri na ha katawhan, padayon pa nga iginbubutang ni Marcos ha kadelikaduhan an katalwasan han nasud, tungod ha buta niya nga pagalagad ha mga dikta han iya imperyalista nga amo nga US. Nagpapagamit hi Marcos ha Indo-Pacific Strategy



han US agud palibutan ngan pugngan an pagkusog han China. Nagtitikada-mo na an mga base militar ngan pasi-lidad han US ha Pilipinas agud mag-is-tasyon han yukut-yukot nga tropa nga Amerikano ha magkalain-lain nga parte han nasud. Iginpapadanas ni Marcos an Pilipinas ha gerra nga ka-ruyag tikangan han US, ha waray hu-nong nga paglansar han mga pagpa-pahiara ngan pangandam ha gerra, ngan pag-iistak han nagtitikadamo nga magbakod nga higamit ha gerra han US nga iginpupuntirya ha karibal hini nga China.

Tungod ha pagpapakuri ngan pagtatraydor ha nasud, dugang nga nahihimulag an naghahadi nga rehi-men ha katawhan Pilipino. Iginbaban-dera ni Marcos an Memorandum Circular No 83 agud bug-os-nga-ka-bangis nga isabrag an pasista nga ngirhat agud puypuyon an pag-ato han katawhan. Kundi diri mapupug-ngan ni Marcos an pagpasulong han militante nga kagiusan masa tungod kay aada ha luyo hini an damo kaupay katawhan nga determinado nga tapu-son an kagutom ngan pagpupoy.

Ginkokonsolida ni Marcos an iya poder ha pagtudlok han masobra 200 nga heneral ha AFP ngan pagtudlok han mga bag-o nga tawuhan ha mga kompaniya nga katin han gubyerno,

samtang ginbabay-og ini han pampu-litika nga krisis atubangan han nag-papadayon ngan nagtitikagrabe nga sumpakiay han mga nagriribalay nga barkadahan.

Ha hingyap nga magpabilin ha poder an ira pamilya, karuyag ni Marcos nga hul-os nga rumkon an mga Duterte agud ulangon an larang han iya karibal nga makabalik ha po-der ha 2028. Kundi baga gin-uuyagan niya an katawhan ha pag-inatras-a-bante han iya mga alipures ha Senado ha pagbista han kaso nga *im-peachment* kontra kan Vice President Sara Duterte, paabat han pag-aareg-luhay han mga dunot nga reaksyunar-yo nga barkadahan. Madagmit nga nalarab an kalayo han kangalas han katawhan ha mga larang nga pugngan an pagbista ngan pabatunon hi Sara Duterte ha pagmalgastar han kwarta han katawhan ngan iba pa nga mag-bug-at nga sala ha katawhan.

Waray igdudurot nga kalungga-nayan an burukrata kapitalista, pa-sista ngan niyutiyo nga rehimen Marcos ha kinabuhi han katawhan Pi-lipino. Ha butnga han nagtitikatarum nga krisis, waray iba nga mapagpipili-an an masa nga nagkukuri ngan tina-lumpigos kundi an makigbisog. Igin-duduso han sitwasyon an mga traba-hador, parag-uma, baga-proletaryado

ngan iba pa nga tinalumpigos nga klase ngan sektor nga magkaurusa agud ipakigbisog an ira mga pakabuhi ngan mga demokratiko nga katungod, ngan ipokus an ira kangalas ngan protesta ha rehimen Marcos, ha im-peryalismo nga US ngan mga pasista nga kaway hini.

Ha mga pabrika, eskoylahan, ha mga komunidad, ha magkalain-lain nga bungto ngan prubinsya, tudlukon an kadagmitan nga mga problema ngan panawagan han masa. Ha basa-ranan hini, bug-uson an solido nga kusog han masa ha porma han mga unyon ngan mga asosasyon, ngan isahon an ira kapukawan. Magmartsa o magrali agud igpakita an hiluagan nira nga pagkaurusa ngan paaninga-lon an ira guliat. Pakusgon o tukuron an mga sanga han Partido ngan mga sikreto nga rebolusyunaryo nga orga-nisasyon masa agud magserbe nga puthaw nga butagtok han hiluag nga masa. Giyahan hira ha ira mga pakig-bisog ngan isahon ini ha pag-ato ha naghahadi nga rehimen Marcos.

Kinahanglan magpursige ha pag-papakusog ngan pagpapahiluag han Bagong Hukbong Bayan komo hinga-niban han katawhan agud hul-os nga tapuson an sistema nga nagtatalum-pigos ngan naniniyupi ha ira. Rekrut-on an pinakadamo nga trabahador, parag-uma, baga-proletaryado, pa-rupangisda, mga petiburges nga inte-lektwal agud magserbe nga mga Pula nga mangaraway ngan mga kuman-der han Bagong Hukbong Bayan.

Atubangan han todo nga kama-darahug ngan brutalidad han nagha-hadi nga rehimen, madig-on an pa-nindugan han BHB nga ipakig-away an kaupayan ngan katungod han ka-tawhan, ngan an ira makatadungan ngan panmaihaan nga ungara ngan interes. Diri mauuwat ni Marcos an mga rebolusyunaryo nga pwersa bi-san pa magsul-ot han maskara nga "kamurayawan" agud itago an pasis-ta nga tango. Mahugot nga kakatinnan han mga Pula nga mangaraway an ira mga armas. Andam hira nga umato para ha katawhan tubtub nga mayda dugo nga ig-aawas. Determinado hira nga ipasulong an gerra han katawhan tubtub ha kadaugan.

 Tuig LVI Ihap 11 Hunyo 7, 2025	
Igin-gagawas an Ang Bayan ha lenggwahe nga Pilipino, Bisaya, Iloko, Hiligaynon, Winaray ngan Ingles. Nakarawat an Ang Bayan han mga kontribusyon ha porma han mga artikulo ngan balita. Gin-aaghat liwat an mga mambarasa nga magpaabot hin mga suson ngan rekomendasyon ha ikauuswag han aton mantalaan.	
Gin-uunod	
Editoryal: Papintason an mga pakigbisog kontra ha pakuri ngan traydor nga rehimen Marcos 1	
Ika-4 nga teoretikal nga kumperensya han NDFP 3	
Pakigbisog han trabahador, drayber ngan kablas 4	
Pananamok han militar ha mga komunidad 5	
OP-OD, iginhimo 5	
Paglanat han rehimen Trump ha mga imigrante 6	
Mga protesta 6	
Ha dagmit nga pulong 7	
Pribatisasyon han CBK Hydroelectric Plant 8	
3 nga <i>war games</i> han US ha Pilipinas, iginlansar 8	
Ka Basavaraju, bayani han rebolusyon Indian 9	
Operation Gideon's Chariot han Israel ha Palestine 10	
An Ang Bayan igin-gagawas duha kabeses kada bulan han Komite Sentral han Partido Komunista ng Pilipinas	
 ang.bayan@cpp.ph	

Teoretikal nga kumperensya hiunong ha kumprador ngan burukrata kapitalismo

Nagtirok ha Nairobi, Kenya ha Africa hadton Mayo 23-24 an 110 nga indibidwal nga nagtataglawas ha 28 nga partido nga proletaryo-sosyalista, pormasyon nga kontra-imperyalista, organisasyon ha pangaliskay, ngan progresibo nga kagiusan han katawhan tikang ha 20 nga nasud ha lima nga kontinente para ha usa nga teoretikal nga kumperensya. Ha pangunguna han National Democratic Front of the Philippines (NDFP) ngan han Communist Party Marxist Kenya (CPMK), nagin madinaugon an kumperensya nga nagtalakay ha burukrata ngan kumprador nga kapitalismo ha mga neokolonya.

An kumperensya, nga gin-ngaranan nga Pankalibutan nga Teoretikal nga Kumperensya Hiunong ha Kumprador ngan Burukrata Kapitalismo ha mga Neokolonya, an ikaupat ha serye han mga kumperensya nga iginlansar han NDFP nga nagtalakay ha mga importante nga karukayaknon ha teorya. Ini an syahan nga kumperensya nga iginlansar ha Africa. Gintalakay ha kumperensya an 21 nga artikulo nga ginsurat han mga komunista ngan proletaryo-sosyalista nga partido, ngan mga kontra-imperyalista nga organisasyon nga namumuno ha kagiusan nga pagtatalwas ha Congo, Cyprus, Guatemala, Indonesia, Iraq, Ireland, Kenya, Kurdistan, Nepal, Pakistan, Palestine, Pilipinas, Sudan, South Sudan, Turkey, Uganda, ngan Zambia.

An duha kaadlaw nga kumperensya nagserbe nga higayon para ha pagplastar han Marxista-Leninista nga pag-analisar ha naeksister nga moda han produksyon ha magkalain-lain nga nasud. Partikular nga gin-analisar dinhi an istorikal nga pag-uswag han mga neokolonyal nga katilingban ha ilarum han kontrol han imperyalismo.

Gin-analisar han mga delegado han kumperensya an materyal nga gamot han burukrata-kapitalismo ngan kapitalismo nga kumprador, basar ha mga sinurat nira Lenin ngan Mao hiunong ha bagakolonyal ngan bagapyudal nga paghahadi, sugadman an mga larang ngan pitad han imperyalismo nga US agud ma-

hipabilin an kontrol ha mga neokolonya.

Gin-adman liwat an papel han magkalin-lain nga klase ha mga neokolonya komo mga lokal nga ahente han pandambong ha ekonomiya, ngan pagpapakaniyutiyo ha pulitika ngan militar ha ngaran han interes han imperyalismo. Pinartisipar an mga delegado ha hilarum nga talakayan para magpahilarum ngan makigbalyuay han pag-analisar ha mga kundisyon nga nag-anak ha mga bagakolonyal ngan bagapyudal nga pankatilingban nga istruktura ha kada ira mga nasud.

Gintalakay liwat an mga praktikal nga karukayaknon nga may kalabutan ha rebolusyunaryo nga buruhaton ngan pagpapasulong han mga kagiusan han katawhan, labina ha konteksto han burukrata-kapitalismo. Gin-analisar han mga delegado an mga estratehiya para ha pag-organisa han mga partikular nga klase han katilingban, sugad han bagaproletaryado, ngan gin-adman kun tiunan-o nahuhurma han natikagrabe nga pankalibutan nga krisis ngan natikahilarum nga imperyalista nga agresyon an pag-uswag han mga pwersa nga rebolusyunaryo, ngan han mas hiluag nga Wala nga kagiusan ha ira mga nasud ngan rehiyon.

An artikulo nga iginpasaro tikang ha Pilipinas ginsurat han Komite Sentral han Partido Komunista ng Pilipinas. Ginlaygay han artikulo an kasaysayan han pagbutho han



kumprador ngan burukrata kapitalismo ha nasud nga resulta han paghahadi han imperyalismo nga US pinaagi han ahente hini ha ekonomiya ngan pulitika. Iginpaklaro liwat dinhi an papel han kumprador ngan burukrata kapitalista para igpabilin an bagakolonyal ngan bagapyudal nga katilingban Pilipino.

Ha paghuhuman han kumperensya, nagpahayag hin pakikig-usa an mga delegado ha iginselebrar nga African Liberation Day hadton Mayo 25 komo pagsalin-urog ha pagtukod ha Organization of African Unity, nga ha dayuday nagin African Union. Igintukod an OAU para igpasulong an pagkaurusa ngan bubligay han kontra-kolonyal nga mga kagiusan nga pagtatalwas ngan bag-o nga turuk nga mga independyente nga gubyerno ha 30 nga nasud nga Africa hadton dekada 1960.

Ginhandum nira ini komo kaparte han komun nga pakigbisog han gintatalumpigos nga mga katawhan kontra ha imperyalismo ngan ngatanan nga reaksyon. Ginpadig-on han kumperensya an pakig-usa han mga pwersa nga kontra-imperyalista ngan proletaryo-sosyalista ha nagpapadayon nga importansya han mga kagiusan nga pagtatalwas ha Africa nga kaparte han mas hiluag nga mga pakigbisog para ha kalugaringon nga pagdedesisyon ngan sosyalismo.

Pakigbisog han trabahador, drayber ngan kabras para ha pakabuhi ngan puruy-anan

Atubangan han nagtitikagrabeng krisis ha ekonomiya ngan hiluagan nga pandestroso han pakabuhi han masa nga anakbalhas, padayon nga natin-dog an mga trabahador ngan kabras ha syudad. Nakikigbisog hira pinaagi han paglalansar hin mga piket, welga, ukoy-pasada ngan barikada han katawhan.

Welga ha Kawasaki. Nagwelga an 140 nga trabahador han Kawasaki Motors Phils. Corporation (KMPC) ha pangunguna han Kawasaki United Labor Union hadton Mayo 21 tungod ha diri pag-abante han negosasyon ha *collective bargaining agreement* (CBA) pinaagi han pamunuan ngan unyon. Nakatukod an piketlayn han unyon ha atubangan han hedkwarters han kompaniya ha Muntinlupa City. Nananawagan hira han makaburuhi nga suhol, makatadungan nga benepisyo ngan pagkilala ha katungod han mga trabahador.

Pakigbisog han mga drayber ha Lucena City. Haros duha kabulan na nga nakawelga an mga drayber ngan trabahador han FOC Transportation Corporation ha terminal hini ha Barangay Comon, Infanta, Quezon. An mga bus nabiyahe ha ruta nga Infanta-Lucena City. Gintikangan an welga tungod ha paghihikaw ha makatadungan nga *separation pay* ngan diri pag-atubang han kompaniya ha negosasyon. Imbes nga batunon an mga demanda han mga trabahador, ginsalawdan hin kaso nga *grave coercion* ngan *illegal strike* an mga trabahador han kompaniya ngan organisador han pederasyon han unyon.

₱1,200 nga makaburuhi nga suhol. Nagpiket an mga trabahador tikang ha National Capital Region (NCR) ha pangunguna han Unity for Wage Increase Now ha Regional Tripartite Wages and Productivity Board-NCR kadungan han pagsasalawad han petisyon para ha ₱1,200 nga makaburuhi nga suhol hadton Mayo 22. Igintuman nira an paggios ngan pag-submit ha iginpatawag

nga konsultasyon ha suhol han RTWPB NCR.

Hadton Hunyo 2, nagpiket an mga trabahador ha atubangan han Kongreso para ig-insister an pagpasa han proposisyon nga ₱200 nga dugang-nga-suhol para ha ngatanaan han trabahador ha nasyunal nga lupog. Duha kaadlaw kahuman hini, iginpasar han Kongreso an nasering nga proposisyon ha ikatulo nga pagbasa. Sering nira, bisan kun hirayo kaupay pa gihapon an dugang nga ₱200 ha ₱1,200 nga makaburuhi nga suhol, kinahanglan na ini aprubahan ha gilayon ngan pirmahan ni Ferdinand Marcos Jr.

NCAP ngan jeepney phaseout, igpabasura. Hadton Hunyo 2, nagkaraban an Stop NCAP Coalition ha mga mayor nga dalan ha Metro Manila ngan nagtirok ha atubangan han upisina han MMDA ha EDSA-Ortigas para igpabasura an No-Contact Apprehension Policy (NCAP). Sigon ha koalisyon, an NCAP ilegal, kontrakabras, ngan waray umagi ha tama nga proseso. Syahan na nga ginkwestyon han mga eksperto ha balaud ngan grupo ha tawhanon nga katungod an palisiya, labina kasumpay ha pankonstitusyon nga basara-

nan ngan mga proseso hini.

Nag-ukoy-pasada ngan nagprotesta an mga drayber ngan opereytor han dyip ha Panay ngan Negros agud igpabasura an Public Transportation Modernization Program (PTMP) ngan Local Public Transport Route Plan (LPTRP) hadton Hunyo 5 ngan Mayo 30. Kaparte ini han semana han protesta nga iginlansar han Piston tikang Hunyo 2 tubtub Hunyo 6.

Barikada ha Mayhaligue, Tondo. Napakyas han pagkaurusa ngan barikada han mga residente han Mayhaligue Street ha Barangay 262 ngan 264 ha Zone 24, Tondo, Manila an demolisyon nga iginlansar han mga pwersa han estado hadton Mayo 26. Upat an ilegal nga gin-aresto han mga pulis ha komprontasyon. Masobra 400 nga pamilya o haros 2,000 nga indibidwal an mawawarayan han puruy-anan ha plano nga demolisyon ngan pag-aangkon han kompaniya nga 2288 Ethan Realty Corporation. Temporaryo nga iginpapahunong han usa nga korte ha Manila an demolisyon kasunod han pagpabor ha petisyon para ha *temporary restraining order* (TRO) hadton Mayo 27.

Demolisyon ha Davao City. Diri mamenos ha 400 nga pamilya an napalayas ha iginhimo nga demolisyon han 500-katawo nga pwersa nga gin-aapihan han 300 nga pulis, ha Upper Arroyo, Barangay Matina Crossing, Davao City hadton Mayo 23. Umabot ha 80 nga balay an ginruba ha demolisyon diin apektado an 60 nga kalgasan ngan diri mamenos ha 200 nga kabataan. Usa nga mando han korte an gin-gamit agud ipatuman an demolisyon kundi para la ini ha pito nga kabablayan ha nasering nga distrito. Temporaryo nga napahunong an demolisyon pinaagi han TRO nga nakuha han mga residente hadton Mayo 24.



Pananamok han militar ha mga komunidad, makamaratay ha mga sibilyan

Duha nga sibilyan ha Negros an nahireport nga namatay tungod ha pananamok han militar ha ira mga komunidad hadton Mayo. Samtang, dirudiretso an pangabuso han mga sundalo ha Albay, Masbate, Bohol ngan Metro Manila.

Ha Negros Occidental, nahireport nga namatay an ginang nga hi Lolita Reman ha Sityo Toril, Barangay Bandila, Toboso hadton Mayo 20, bunga han grabe nga kahadlok ngan ugmad ha mga operasyon han 79th IB ha lugar. Ginreyd ngan ginpanhalikwat han mga sundalo han 79th IB an balay nga pananag-iya han pamilya Mahusay diin nakadto an ginang.

Sugad liwat hini nga insidente an nahitabo ha Barangay Minapasok, Calatrava. Gin-atake han *stroke* an parag-uma nga hi Boyet de Asis hadton Mayo 23 tungod ha pagtarhug ha iya han pito nga sundalo han 79th IB ngan mga traydor nga hira Marlon Basalo ngan Jonel/Mike ha Sityo Kapanuya.

Hadton Mayo 31, piniritay nga ginsakob ngan ginpanhalikwat han mga sundalo han 79th IB an balay han mag-asawa nga Alejandro ngan Maricel Villamero ha Sityo Manaysay, Barangay Cambayobo, Calatrava. Ginkawat han mga sundalo an masobra ₱7,000 nga maiha na nga gintirok nga kwarta han mag-asawa.

Ha Masbate, iginpailarum ha madarahug nga interrogasyon han mga sundalo han 96th MICO an 12 nga sibilyan tikang ha Uson, Masbate hadton katapusan nga semana han Mayo. Pirit hira nga ginpapaamin nga mayda hira sumpay ha BHB. Naggrabe an sakit han usa ha mga biktima kahuman han interrogasyon ngan kinurian ini magyakan kahuman atakehon han sakit ha kasingkasing ngan *diabetes* tungod ha kahadlok ngan troma.

Ha Negros Oriental, ginkadto han mga sundalo an balay han parag-uma nga hi Alan Garde ha Barangay Sandayao, Guihulngan City hadton Mayo 15. Pirit nga ginpapaamin hi Garde nga may sumpay ngan nasuporta hiya ha BHB. Hito gihapon nga adlaw, ginsakob han mga sundalo an balay ni Rocky Fat ngan ginpanhalikwat han mga sundalo. Ginpagawas han mga sundalo nga mayda nakumpiska nga armas tikang ha iya ngan gin-atentar nga dakpon kundi nanindugan an iya pamilya kontra hini.

Tikang Mayo 3, iginpailarum han 83rd IB ha бага-balaud militar nga paghahadi an

tulo nga barangay ha Caramoan, Camarines Sur. Ginharas, gintarhug ngan gintahapan an mga residente han komunidad, partikular an unom nga indibidwal, nga mga kaurupdan o tagsuporta han BHB. An pira ha mga biktima ginpipirit han militar nga igawas ngan "isurrender" an ira mga asawa nga gintatahapan nga Pula nga mangaraway. Pira kabeses liwat piniritay nga ginsakob an balay han mga residente ngan iligal hira nga ginkukuhaan hin litrato han mga sundalo.

Ha Northern Samar, iginpailarum ha hamlet han AFP an mga barangay ha Catubig, Las Navas, Gamay, Mapanas ngan Palapag tikang hadton Hunyo 4. Igin-imponer ini han militar kasunod han ginsesering nga engkwentro han AFP ha BHB hiton nga adlaw ha Barangay Nagoocan, Catubig. Gindi diri nga gumawas han baryo an mga residente bisan pa kun ha kalugaringon nga uma, kasapit nga baryo, o ha bungto la hira makadto. Antes hini, samwak an panmirit han militar ha mga residente ha bungto han Palapag nga "pasurenderon" an ira mga kaurupdan nga gintatahapan nga mangaraway han BHB.

Pangaresto ngan pagsalawad hin hinimu-himo nga kaso. Ginaresto ha kaso nga *illegal possession of firearms and explosives* ngan gin-akusaran nga membro han BHB hi "Ruben", 47, trabahador ha konstruksyon ngan residente han Barangay Namantao, Daraga, Albay. Ginsikmit hiya han mga elemento han 31st IB ha iya balay hadton Mayo 23 ngan gindara ha usa nga bakante nga balay. Nagpabuto hin pusil an mga sundalo para pagawason nga nagkamayda hin engkwentro.

Ha Bohol, nagpasamwak hin buwa nga balita ngan impormasyon an CIDG hadton Mayo 23 kontra kan Carmilo Tabada, konsehal ha usa nga barangay ha bungto han Trinidad. Gin-akusaran hiya nga upisyal ha pinansya han PKP ngan ginsesering nga ginaresto tungod ha kaso han "terrorism financing." Iginklaro ni Tabada nga hiya mismo an dinaup ha korte ngan nagpiyansa kasumpay han kaso.

OP-OD, iginhimo han mga rebolusyunaryo nga grupo

PIRA KAADLAW ANTES ngan kahuman han reaksyunaryo nga eleksyon hadton Mayo 12, naghimo hin operasyon pinta-operasyon dikit (OP-OD) an magkalain-lain nga organisasyon nga alyado han National Democratic Front (NDF) para ibuksas an kadunutan hini. Prinsipal nga mensahe ha mga OP-OD an pagpalandaw nga an rebolusyon an tinuod nga solusyon nga amo an magdudurrot han tinuod nga pankatilingban nga pagbabag-o ha nasud, diri an reaksyunaryo nga eleksyon.

Landaw kaupay an elektroniko nga panlimbong ngan iba pa nga tipo han anomaliya para pumabor ha mga tinaglawas han mga agaron maytuna, kumprador burgesya ngan han imperyalista nga US. Mas nabuksas han kahuhuman pala nga eleksyon an karat-an ngan pagin buwa han nasering nga "demokratiko nga proseso."

Nanawagan hira ha kawatwan nga kumadto ha kabaryuhan, umapi ha Bagong Hukbong Bayan (BHB) ngan ipasulong an gerra han kawatwan.

Iginlansar an mga aktibidad han Kabataang Makabayan, Artista at Manunulat ng Sambayanan, Liga ng Agham para sa Bayan, Katipunan ng mga Samahang Manggagawa ngan panrehiyon nga tsapter han NDF. Iginhimo nira ini ha Polytechnic University of the Philippines-Sta. Mesa, University of the Philippines (UP)-Los Baños, UP Manila, ha mga kalsada han Manila, Baguio City, Rizal ngan Quezon.

Pag-inantos han mga Pilipino ha paglanat han rehimen Trump ha mga imigrante

TIKANG HAN UTRO nga liningkod hi Donald Trump komo presidente han US hadin Enero, waray hunong an hiluagan nga pag-atake, panlanat, piniritay ngan arbitrario nga pagpapalayas o deportasyon ha mga trabahador nga imigrante ha US. Tikang Enero tubtub Mayo inabot hin sobra 271,000 nga mga imigrante an ginpadeport han administrasyon samtang diri mamenos ha 49,184 nga imigrante an nakadetiner yana ha magkalain-lain nga pasilidad han Immigration and Customs Enforcement (ICE) ha US.

Sigon ha embahada han Pilipinas ngan basar ha mga kaso nga katin han Tanggol Migrante, gintatantiya nga diri mamenos ha 30 nga Pilipino nga imigrante an nahireport nga napadeport yana nga tuig. Diri makuha an eksakto nga ihap han nakadetiner o nadeport han ICE tungod kay waray ini igin-gagawas nga impormasyon.

Aada ha 150,000-370,000 an Pilipino nga waray dokumento o iligal nga naukoy ha US.

Sigon ha Bayan USA, diri sadang an ginhihimo nga aksyon han embahada han Pilipinas ha US ngan mga konsulado hini para ha mga Pilipino nga imigrante nga nakapriso ngan nakatalaan nga paulion. Duro an ira pagpasibaya ngan pagbalewaray ha mga Pilipino nga imigrante nga namimiling hin bulig. Bisan an ayuda nga Assistance to the Nationals Fund han embahada iginhikaw ha mga nanginginahanglan.

Atubangan han pagpasibaya han rehimen US-Marcos, padayon an pangampanya ngan pag-oorganisa han mga organisasyon ha US ha pangunguna han Tanggol Migrante, mga alyado nga organisasyon, ngan mga Pilipino ha komunidad. Naglansar hira han magkalain-lain nga aktibidad sugad han *press conference*, rali, pagbisita ha mga nakadetiner, pagpapadara hin surat ha mga hukmanan ngan pangalap hin donasyon para ha dagmit nga pagpapagawas ha mga igindetiner ngan pagbulig ha ira mga pamilya.

Tungod ha duruyog nga paggios han mga katawhan ha US, nahimo nira nga mapagawas hi Michelle (diri tinuod nga ngaran) hadton Abril 30 ngan hi Lewelyn Dixon hadton Mayo 29, ngaduha igindetiner ha NorthWest ICE Detention Center (NWDC) ha Tacoma, Washington.

Nakadetine pa gihapon ha presente hira Maximo Londerio, Rodante Rivera, Ligaya Jensen ngan Alma Bowman, nga mga residente han US nga pira kadekada na nga naukoy dinhi.

Nanawagan naman an mga demokratiko nga organisasyon ha US hin dagmit nga aksyon tikang ha gubyerno han Pilipinas. Sering nira, kinahanglang hini tagan hin sadang nga suporta an ngatanan nga imigrante, kaupod an naatubang ha deportasyon, trafficking (pamaligya hin ta-wo) o pangawat hin suhol. Nanawagan liwat hira kan Ambassador Jose Manuel Romualdez nga lumusad nala ha pwesto kun diri niya kaya papel/igpatuman an iya trabaho nga panalipdan an mga Pilipino ha US.



Bistahon hi Sara Duterte. Nagprotesta ha Senado ha Pasay City an mga progresibo nga grupo hadton Hunyo 3 agud manawagan nga tikangan na an tinuyo nga gindelatar nga pagbista ha kaso nga impeachment ni Vice President Sara Duterte. Ginsukna nira an pagdelatar gamit an damo nga pasangilan han Senado agud tikangan ini. Hatdon Pebrero pa nahisubmitter han House of Representatives an mga artikulo han *impeachment*.

Paluyu-luyo na liwat an pagsukna ha Senado tungod ha pagtalapas hini bisan ha Konstitusyon nga 1987 tungod ha pagdelatar ha pagbista. Usa na hini an mga propesor han University of the Philippines College of Law. Samtang, nakatalaan maglansar hin hiluagan nga protesta ha Hunyo 11, adlaw han pagbista han Senado ha *impeachment*, an magkalain-lain nga mga grupo ha pangunguna han Taumbayan Ayaw sa Magnanakaw at Abusado Network Alliance (TAMA NA).

Ato, parupangisda. Naglansar hin *fluvial parade* o parada han mga baloto an Pamalakaya ngan Save Laguna Lake Movement ha Muntinlupa City hadton Mayo 31, nasyunal nga adlaw han mga parupangisda, agud ipanawagan an pagpapabasura ha mapanhibang nga Laguna Lake Roadshore Network Project ngan 2,000-kektarya nga *floating solar power project* ha Laguna de Bay.

Hadton Mayo 30, duruyog nga nagmartsa an pira kagatos nga parupangisda, mga tagsuporta ngan tag-undong han kalibungan tipakadto ha Mendiola ha Manila. Nanawagan hira han pagdepensa ha katungod han mga parupangisda, pagtipa ha reklamasyon, ngan pagbawi ha desisyon han Korte Suprema hiunong ha 15-kakilometro nga *municipal waters*.

Hustisya para kan Junver. Nagdagkot hin mga kandila an mga estudyante han University of Santo Tomas ha kampus hini ha Manila hadton Mayo 29 komo panawagan han hustisya ha pagkamatay ni Junver Toledo, 22, igkasi nira estudyante. Nahireport an pag-unay ni Toledo, usa nga estudyante ha UST College of Rehabilitation Sciences hadton Mayo 17 tungod ha presyur ha pangeskoyla.

Pagawason an mga priso pulitikal. Naglansar hin piket-protesta an Karapatan-National Capital Region ha atubangan han Quezon City Hall of Justice hadton Mayo 20. Panawagan nira nga dagmit nga pagawason ngan ibasura an mga kaso nga *illegal possession of firearms and explosives* kontra ha mga unyonista nga hira Mark Ryan Cruz, Romina Astudillo, ngan Jaymie Gregorio, nga kaparte han Human Rights Day 7. Nakatalaan an pagbista hiton nga adlaw kundi waray umulpot an hukom tungod kay "nagbabakasyon" kunuhay ini sanglit iginbalhin an pagbista ha Agosto.

71 ha 82

nga prubinsya nagpapabilin nga kontrolado han mga **dinastiya ha pulitika** kahuman han 2025 nga eleksyon, pareho la antes an eleksyon.

3 nga sekretaryo

la an **gintanggal ni Marcos Jr** ha iya gabinete kahuman an pakita-ha-tawo nga pagpaparesayn niya ha bug-os nga gabinete agud batunon kunuhay an guliat han katawhan para ha pagbabag-o.



lab-as nga isda an gintutugutan nga ig-import ha rason nga serrado hin 3 kabulan tikang Hunyo 1 an *fishing season* ha **Davao Gulf** ngan iba pa nga pangisdaan.



o tubtub ₱600M/bulan an nalulugi ha mga negosyo ha **Tacloban City** samtang nakaimponer an mga restriksyon ha pagbiyahe han dagko nga trak ha **San Juanico Bridge**.



911

an kumpirmado nga kaso han MPox (**monkeypox**) ha Pilipinas tikang 2024 tubtub Hunyo 4, 2025. Diri ini nasamwak ha hangin sugad han Covid-19 kundi pinaagi han pagdigkit ha lawas ha usa nga tawo nga mayda sakit hini, o ha mga gamit nga kontaminado.

57/adlaw

bag-o nga kaso han **HIV** ha Pilipinas hadton Enero-Marso 2025, mas hitaas tanding ha 50% ha kapareho nga mga bulan hadton 2024. **Pinakadamo ha mga kaso may edad nga 15-25.**



1-10

ha pinakahitaas an sweldo ha gubyerno hadton 2024 tanan mga upisyal han **Bangko Sentral han Pilipinas**; pinakahitaas an sweldo han pinuno hini nga hi Eli Remolona nga nakita hin ₱47.96M kada tuig.

70%

nga mas hitaas an ihap han mga kaso han **krimen** nga ginkakadabihan han mga **sundalo nga Amerikano** ha **South Korea** hadton 2023 tanding hadton 2018.

Ginkuhaan: 2024 Justice Yearbook, Ministry of Justice, South Korea



Pribatisasyon han CBK Hydroelectric Plant, ginkundenar

Mahugot nga ginsukna ni Atty. Carlos Zarate, hadto anay representante han Bayan Muna, an plano han rehimen Marcos nga igsapribado an Caliraya-Botocan-Kalayaan (CBK) *complex*. Sering niya, magdudurot la ini hin mas pagmahal han sukot ha kuryente nga dugang nga paras-anon han katawhan nga nakasarig ha serbisyo.

"Kinahanglan an gubyrno an may kontrol ha mga nangunguna nga serbisyo sugad han kuryente. Imbes nga ibaligya an CBK, kinahanglan ini himuon nga modelo han *renewable energy* nga magpapahimubo han sukot ha kuryente para ha ngatanan," dugang ni Zarate.

Nakatalaan an pribatisasyon han CBK *complex* ha katapusan han Hunyo yana nga tuig. Sigon ha Department of Finance (DOF) posible nga kumita an gubyrno hin ₱50 kabilyon piso (\$897.99 kamilyon dolyar) tubtub ₱100 kabilyon piso tikang ha pribatisasyon han pasilidad.

An 728 *megawatt* (MW) Caliraya-Botocan-Kalayaan *hydropower complex* an nalalain nga naandar nga *hydroelectric facility* nga pananag-ya han Pilipinas. Ini liwat an pinakadaan nga *hydropower plant* ha nasud.

Ginkokomponer an CBK *complex* han Botocan *hydro electric power plant* (HEPP) nga igintindog hadton 1939 nga may 20.8MW nga kapasidad, han Caliraya HEPP nga igintindog hadton 1942 nga may kapasidad nga 22MW, ngan Kalayaan *pump storage power plant* nga igintindog hadton 1983. Nakatindog an mga planta ha mga barangay han Kalayaan, Lumban ngan Majayjay ha Laguna.

Syahan nga ginpauswag an *complex* ha ilarum han National Power Corporation (NAPOCOR). Hadton Pebrero 7, 2001, upisyal nga gindumara han CBK Power Company Limited an pagdumara ha CBK *complex* ha ilarum han Build-Operate-Transfer *scheme* han gubyrno han Pilipinas pinaagi han NAPOCOR nga mahuhuman kataliwan hin 25 katuig.

Hadton Abril 2005, nakuha tikang ha orihinal nga tag-ya an CBK BROT Agreement han duha nga Japanese nga kompaniya—an Electric Power Development Co., Ltd (J-Power) ngan Sumitomo Corporation. Mahuhuman an kontrata hini ha Pebrero 2026.

An CBK *complex* usa ha tulo nga nasasalin nga dagko nga planta han kuryente nga pananag-ya han gubyrno. Iginpailarum ini ha Power Sector Assets and Liabilities Management Corporation (PSALM) para ha pribatisasyon han mga pasilidad. Nakatalaan na liwat nga igbaligya an duha pa—932MW Agus-Pulangi *hydropower complex* ha Mindano *grid*; ngan an 210MW Mindanao *coal plant*. AB

3 war games, dudrunan nga iginlansar han US ha Pilipinas

BUTARAY NGA PAGTAMAK ha soberaniya han Pilipinas an presensya han yukut-yukot nga sundalo nga Amerikano, Australian ngan iba pa nga langyaw nga tropa ha teritoryo han nasud para ha mapansulsol ngan tinagdako nga *war games*. Tikang Mayo, tulo hini an dudrunan nga iginlalansar han US, usa pinaagi han kapadis hini nga hukbo han Australia. Amo ini an Kamandag (Mayo 26-Hunyo 6), Kasangga (Mayo 19-Hunyo 24) ngan Salaknib 2025 Phase 2 (Mayo 19-Hulyo 20).

Iginlansar an Kamandag ha Batanes; ha Capas, Tarlac diin ginhihimo an *live-fire drills* ngan ha Burgos, Ilocos Norte diin iginlansar an usa nga *maritime strike operation*. Mayda gihap mga aktibidad ha Palawan ngan iba pa nga parte han Luzon ngan ha Tawi-tawi ha Mindanao.

Gin-gamit han mga tropa han US ngan Pilipinas an Navy-Marine Expeditionary Ship Interdiction System (NMESIS) ngan High Mobility Artillery Rocket System o HIMARS ha Kamandag. An NMESIS usa nga sistema han misayl nga *anti-ship* o pampasabog han barko. Nakakarga ini ha usa nga *unmanned ground vehicle* (dako nga trak) nga gintatawag nga ROGUE Fires Carrier ngan may dara nga Naval Strike Missile (NSM).

Pinartisipar ha *war games* an 2,031 nga sundalo han US Marine Corp ngan 2,028 nga pwersa nga tikang ha Pilipinas. Mayda liwat mga tawuhan militar tikang ha South Korea, Japan ngan United Kingdom nga napartisipar ha *war games*. Nagseserbe naman nga mga "tag-observer" an mga tawuhan tikang ha France, Canada, Bahrain, Australia, Indonesia, Thailand ngan Netherlands.

Gin-abrihan an Kasangga ha kampo han 4th ID ha Cagayan de Oro City ngan ginhimo ha Camo Kibartan, Kalilangan, Bukidnon. Diri mamenos ha 90 nga sundalo tikang ha Australian Army ngan 140 nga sundalo han Philippine Army an pinartisipar ha *war games*. Mag-iiha tubtub Hunyo 24 an Kasangga.

Samtang, an Salaknib han US ngan Pilipinas iginlalansar yana ha Northern Luzon.

Iginlalansar ha nasud ini nga mga *war games* agud pahugton han US an kontrol hini ha AFP, sigon ha Partido Komunista ng Pilipinas (PKP).

"Natipa an katawhan Pilipino hini nga mga *war games*. Dugang ha gindadara hini nga peligro ha mga Pilipino, peste pa ini ha residente nga nahihikawan han pakabuhi agud tagan-lugway an mga pagpapahiara," sigon kan Marco Valbuena, puno nga upisyal ha impormasyon han PKP.

An tinagdamo nga suso nga *war games* ngan an pagpakaniyutiyo han AFP ngan han rehimen Marcos an rason kun kay ano iginkokonsidera han damo nga nasud ha Asia an Pilipinas komo *proxy* han US, sigon pa ha PKP. Diri buta an mga kaaramyaw nga nasud ha Asia ha pagin sunud-sunuran ni Marcos ngan mga heneral hini ha direksyon ngan plano han US.

Kasamang Basavaraju, bayani han rebolusyon Indian ngan pankalibutan nga proletaryo

Nagpasidungog an Partido Komunista ng Pilipinas (PKP) kan Kasamang Basavaraju (Nambala Keshave Rao), pankabug-usan nga sekretaryo han Communist Party of India (Maoist), nga namartir kaupod an 27 nga iba pa hadton Mayo 21. Ginpatay hira han mga pwersa han estado han India nga gintawag nga Masaker ha Gundekote, ha Abhujmad ha distrito han Narayanpur ha Chhattisgarh, India.

Nagraranggat yana ang ngaran ni Kasamang Basavaraju ha ranggo han mga imortal nga bayani han epiko han gerra han katawhan ha India ngan han mga rebolusyunaryo nga pakigbisog para ha nasyunal nga katalwasan ngan sosyalismo ha bug-os nga kalibutan. Ginkatinan niya an sullo han armado nga pakig-away ha India ngan nagserbe nga lamrag ha dalan han pankalibutan nga rebolusyunaryo nga proletaryo, labina ha mga naglabay nga dekada han mga kapakyasan ngan kaperdihan han mga sosyalista nga pwersa ha magkalain-lain nga parte han kalibutan.

Hin-o hi Kasamang Basavaraju?

Igin-anak hi Kasamang Basavaraju hadton 1955 ha pamilya han mga parag-uma ha komunidad han Jyannapetta ha distrito han Srikakulam, Andhra Pradesh nga aada ha sur-este han India. Nag-eskoyla hiya han elementarya ngan hayskul ha ira distrito ngan kinadto ha syudad han Warangal ha kasapit nga estado han Telangana agud mag-aram han inhinyeriyha ha kolehiyo.

Samtang aada ha kolehiyo, napukaw hiya ha kamutangan ngan pakigbisog han katawhan Indian rason para magpartisipar hiya ha kagiusan estudyante. Hadton dekada 1980, nagin kaparte ngan pumapel hiya han yawe nga responsabilidad ha CPI (Marxist-Leninist) People's War. Nagin kaapi hiya han komite sentral han partido hadton 1992.

Hadton 2004, kaupod hiya ha mga nanguna ha pagtitig-ob han CPI (ML) People's War ngan han Maoist Communist Centre of India (MCCI) agud bug-uson an CPI (Maoist). Usa hiya ha mga nagtukod han hukbo han katawhan

han han India nga People's Liberation Guerilla Army (PLGA) hadton 2000. Ginpamunuan niya ini ha maiha nga panahon ngan nanguna ha damo nga kadaugan ha pagbubug-os han mga rebolusyunaryo nga base ngan paglansar hin mga taktikal nga opensiba kontra ha mga pasista nga pwersa.


Nagserbe hiya nga kaapi han Komite Sentral ha sakob han 33 katuig ngan han Politburo ha sakob han 25 katuig. Ginpamunuan niya ha maiha nga panahon an Sentral nga Komisyon Militar han CPI (Maoist). Hadton urhi nga parte han 2018, igin-eleher hiya ha Komite Sentral komo pankabug-usan nga sekretaryo han CPI (Maoist) ngan sinaliwan ha pamumuno ni Kasamang Ganapathy.

Panawagan para ha hustisya

Hustisya an nagkakaurusa nga guliat han katawhan nga Indian ngan mga internasyunal nga partido ngan organisasyon ha pagpatay kan Kasamang Basavaraju ngan 27 nga iba pa nga mga kasama. Nahirekord ha Masaker ha Gundekote an mga pagtala-pas ha internasyunal nga makatawo nga balaud ngan mga pagsurundon ha gerra.

Sigon ha report han Dandakaranya Special Zonal Committee han CPI (Maoist), an 27 nga mga kasama nga kaapi han CPI (Maoist) ngan mangaraway han PLGA napatay ha pag-ensirkulo han yukut-yukot nga militar ngan pulis han reaksyunaryo nga estado ha ira kampo. Iginbuksas han komite nga kahuman han mga agway buhi nga nadakop hi Kasamang Basavaraju ngan tinuyo nga patayon han mga berdugo nga tawuhan han rehimen Modi.

An brutal nga Masaker ha Gundekote kaparte han terorista nga



kampanya nga Operation Kagaar. Gintikangan an operasyon hadton Enero 2024 diin ginamit han yukut-yukot nga armado nga pwersa an reaksyunaryo nga estado, nagtindog hin gatus-gatos nga panmilitar nga detatsment ngan nagpatuman han kampanya han pagpatay ngan terorismo kontra prinsipal ha mga Adivasi, o minoriya han India.

Ha presente, ginduduso han magkalain-lain nga demokratiko nga organisasyon ha India an imbestigasyon ha Masaker ha Gundekote. Karuyag nira nga papagbatunon an rehimen Modi ngan mga panmilitar nga upisyal hini ha ura-ura kagrabe nga mga krimen.

Samtang, iginpahayag han Komite Sentral han PKP an hul-os nga pagtapod han Komite Sentral han CPI (Maoist) nga dagmit ini nga mapili han pinuno nga katupong an karit kan Kasamang Basavaraju agud akuon an ginkatinan niya nga mga responsibilidad. Sering han pamunuan, kumpanya ini nga ha pagtitig-ob han kahibaruan han mga edaran nga kadre ngan han rayhak ngan kabaltok han mga barubata nga kadre, mauungbawan han CPI (Maoist) an ngatanan nga ayat, magpapadayon ha dalan han rebolusyunaryo nga armado nga pakig-away, ngan magkakab-ot hin dugang pa nga kadaugan ha gerra han katawhan ha India.

Operation Gideon's Chariots, makamaratay nga hampak han Israel ngan US ha milyun-milyon nga Palestino

Ha syahan nga 24 kaoras han madugo nga kampanya nga Operation Gideon's Chariots han US ngan Israel, 144 nga Palestino an napatay dayon ha mga bomba ngan pangatake han tropa hini ha Gaza. Ha sumunod nga mga adlaw, susrunod nga gin-atake han mga pwersa nga Israeli an mga bakwitan ngan nasasalin nga mga ospital ngan eskoylahan agud tabrugon an mga Palestino ngadto ha mga prisuhan nga igin-andam para ha ira. Gatus-gatos ha mga napatay mga bata.

An Operation Gideon's Chariot, nga gintikangan hadton Mayo 18, an makamaratay nga hampak han Israel ngan US ha yana an 18-kabulan na nga henosidyo ngan 77-katuig nga brutal nga okupasyon hini ha mga teritoryo han Palestine. Katuyuanan hini nga direkta nga sakupon an bug-os nga Gaza ngan prisuhon an aada ha 1.5 kamilyon nga Palestino ha "sentro han ebakwasyon" ha sur nga dapit han engklabo (nakakordon nga teritoryo).

Tikang Oktubre 2023, inabot na ha 63,000 nga Palestino an direkta nga ginpatay ngan 118,300 an nasamaran han panmomba ngan pangatake han Israel. Haros katunga han mga biktima mga bata ngan kababayin-an. Gintatantiya nga gatus-gatos kayukot pa an namatay tungod ha kagutom, sakit ngan kakulang han medikal nga pasilidad. Damo liwat an natagbunan na la han binagsak nga mga bilding ngan balay, nga waray na makit-an o naukab tungod ha waray wantas nga pangatake han Israel.

Paggamit ha pagkaon ngan ayuda komo armas ngan negosyo

Inabot na ha lebel-han-kalamidad an kagutom ha Gaza labina tikang Marso kun kan-o absoluto nga igindiri han Israel an pagsulod han ngatanaan nga klase han ayuda. Hadton Mayo, iginhatag hini an responsabilidad ha pagdistribwer han pagkaon ha Gaza Humanitarian Foundation (GHF), usa nga pribado nga kompaniya nga magkabakyang nga igin-tukod han US ngan Israel agud "per-dihon" an Hamas.

Mahugot nga ginsukna han Uni-

ted Nations an paggamit han Israel ha GHF, nga sering hini sukwahi ha angay pagin nyutral, imparsyal ngan independyente han makatawo nga buruhaton. Ginkundenar han UN ngan han damo nga nasud ngan internasyunal nga institusyon, an paggamit han Israel ngan US han ayuda ngan pagkaon komo armas kontra ha mga sibilyan.

Labot ha GHF, ginpasulod liwat han Israel an iba nga pribado nga kompaniya nga Amerikano agud umakto nga "panseguridad nga pwersa" ha mga sentro han distribusyon hini. Kalakip dinhi an Safe Reach Solutions, UG Solutions ngan S.R.S Security Firm, nga ngatanaan panag-iya han mga hadto anay heneral han US Army ngan Central Intelligence Agency. An pagpili hini nga mga kompaniya ginhimo han pinakahitaas nga upisyal han Israel, kabakyang ang US, hin diri gin-aagi bisan ha kada tagsa nira nga parlamento ngan kongreso.

Dirudiretso nga pankalibutan nga mga protesta

Milyun-milyon nga katawhan ha bug-os nga kalibutan an nagkaurusa nga nagprotesta kontra ha panibag-o nga hugna han henosidyo ha Gaza. Panawagan nira an dagmit ngan permanente nga ukoy-bubto ha Gaza ngan pag-undang han brutal nga pangangatake ngan panomba han Zionista nga Israel. Igintuman an mga protesta ha paghandum ha ika-77 nga anibersaryo han Nakba o Ang Sakuna, an syahan nga higayon nga mardahug nga ginpalayas han mga Zio-



nista an mga Palestino tikang ha ira mga tuna agud tukuron an estado han Israel.

Gatus-gatos nga mga paggios an ginhimo ha mga syudad ha Middle East, Europe, Asia, Africa ngan magin ha sakob mismo han US. Damo nga kabatan-unan nga estudyante han US an maisugon nga naglansar han mga protesta ngan diskusyon ha mga unibersidad ha butnga han grabe nga pan-gigipit ha ira.

Ha Pilipinas, nakig-usa an Moro-Christian Peoples Alliance (MCPA) ha pankalibutan nga panawagan han dagmit ngan permanente nga ukoy-bubto ha Gaza.

Sigon kan Amirah Lidasan, pankabug-usan nga sekretaryo han MCPA, "tikang han nautod an ukoy-bubto, an Zionista nga Israel ngan an numero uno hini nga tagapondo waray iginpakita nga kaluoy ha mga kabugtuan nga Palestino."

Nananawagan hiya ha internasyunal nga komunidad nga padayon nga aghaton an ira mga lider nga maghimo hin aksyon kontra ha waray hunong nga pangatake han Israel. "An katalwasan han usa katalwasan han ngatanaan, labina yana ha atubangan han grabe nga pagtalapas ha tawhanon nga katungod, kinahanglan diri kita humunong tubtub nga diri natatalwas an Palestine," sering niya.

Hadton Marso 23, naghimo an grupo hin porum ngan martsa ha University of the Philippines-Diliman. Nakatuman ini ha ika-8 nga anibersaryo han pag-imponer ni Rodrigo Duterte han balaud militar ha Mindanao ngan pagrhumok ha Marawi City, an nag-uusahan nga Islam nga syudad ha nasud, hadton 2017. AB